

Sumáriu Kazu
Tribunál Judisiál Primeira Instáncia Oekusi
Setembru 2025

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

A. Sumáriu prosesu julgamentu kazu iha Tribunál Judisiál Primeira Instáncia Oekusi

1. Totál kazu ne'ebé JSMP monitoriza: 22

Artigu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika	13
Artigu 157 (1) KP no artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ameasa no ofensa ba integridade física simples ho natureza violénsia doméstika	1
Artigu 258 KP no artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Danu simples no ofensa ba integridade física simples ho natureza violénsia doméstika	1
Artigu 138 KP, konjuga ho artigu 2, 3, no 35(b) no 36 (LKVD)	Omosídiu simples ho natureza violénsia doméstika	1
Artigu 155 (1(a)) KP, konjuga ho artigu 2, 3 (c), no 35(b) no 36 (LKVD)	Maus tratus ba menór ho natureza violénsia doméstika	1
Artigu 274 KP, artigu 171 KP, 173 (d) KP, artigu 172 KP, 173 (d) KP, artigu 172 KP, 23 KP no artigu 24 KP	Abuzu seksuál ba menór, koasaun seksuál agravadu, violasaun seksuál agravadu no tentativa violasaun seksuál	1
Artigu 172 KP no 173 KP	violasaun seksuál no agravaun	1
Artigu 145 KP, 153 KP no artigu 20 hosi Lei Arma Brankas	Ofensa ba integridade física simples, maus-tratus ba inkapáz no arma brankas	1
Artigu 146 KP no artigu 20 hosi Lei Arma Branka	Arma brankas no ofensa ba integridade física grave	1
Artigu 316 KP	Kontrabandu	1
Totál		22

2. Totál desizaun ne'ebé JSMP monitoriza : 6

Tipu pena	Artigu	Númeru
Suspensaun ba prizaun nia ezekusaun	Artigu 68 KP	1
Pena multa	Artigu 67 KP	4
Pena multa no omologa pedidu dezisténsia keixa	Artigu 67 KP	1
Totál		6

3. Total kazu sira ne'ebé kontinua prosesu tuir JSMP nia monitorizasaun: 16

B. Deskrisaun sumáriu julgamentu ba desizaun kazu sira

1. Krime ofensa ba integridade fízika simples ho natureza VD

Nú. Prosesu : 0001/22.OEPMK
 Kompozisaun Tribunál : Singulár
 Juis : Dr. Evangelino Belo
 Prokuradór : Dr. Mateus Nesi
 Defeza : Dr. Calisto Tout
 Desizaun : Pena multa US\$45.00

Iha 19 Setembru 2025, Tribunál Judisiál Primeira Instánsia Oekusi, prezide leitura sentensa ba krime ofensa ba integridade fízika simples ho natureza VD ne'ebé envolve arguidu EFS hasoru nia feen, iha Rejiaun Administrativa Espesiál Oekusi Ambeno (RAEOA).

Akuzasaun Prokuradór

Prokuradór akuza katak iha 31 Dezembru 2022, iha oras tuku 08:00 dadeer, ofendida husu telefone ba arguidu atu uja, maibé arguidu lakohi entrega telefone ba ofendida no ofendida tenta atu foti arguidu nia telefone iha arguidu nia kalsa bolsu. Ho nune'e arguidu buti dala ida iha ofendida nia kakorok no dudu ofendida to'o monu ba rai rezulta ofendida sofre moras. Kazu ne'e aneksa hamutuk ho relatóriu médiku hosi Pradet no fotografia kona-ba aktu ne'e hasai hosi Polísia-VPV.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penal to'o tinan 3 ka multa konjuga ho artigu 2, 3 no 35 (b) no 36 LKVD no artigu 258 KP kona-ba danu simples ho moldura penál to'o tinan 3 ka multa.

Produsaun ba prova sira

Iha julgamentu, arguidu konfesa faktu hotu iha akuzasaun no depoisde akontesimentu arguidu deklara katak arrepende nia hahalok, seidak di'ak malu tanba depoisde akontesimentu arguidu fila fali moris hamutuk ho nia feen boot iha Baukau. Arguidu serbisu hanesan badaen maibé depoisde akontesimentu to'o agora seidak serbisu, nune'e laiha rendimentu fiksi kada fulan, foin primeiravés halo krime hasoru nia feen ki'ik no mai hatan iha tribunál, iha oan na'in rua hela ho ofendida no promete sei larepete hikas nia hahalok sira hasoru ofendida ka ema seluk iha futuro.

Alende ne'e, ofendida kontinua konfirma faktu sira hotu iha akuzasaun no deklara katak depoisde akontesimentu to'o agora seidauk dame malu tanba arguidu moris hamutuk fali ho nia feen boot iha Baukau husik hela oan na'in rua hela ho nia inan.

Prokuradór husu ba tribunál atu presinde depoimentu hosi testemuña no hosi parte defeza laiha opsaun seluk. Nune'e tribunál bazeia ba pedidu hirak ne'e hotu no presinde testemuña nia depoishmentu tanba konsidera faktu sira ne'ebé produs sufisiénte ona.

Alegasaun finál

Prokuradór konsidera arguidu nia hahalok ne'e preense duni elementu krime ofensa ba integridade física simples ho natureza violência doméstica. Tanba ne'e, prokuradór husu ba tribunál atu aplika pena prizaun fulan neen suspende ba tinan ida, nu'udar prevensaun ida ba arguidu atu la repete hikas nia hahalok ne'e iha futuro.

Alende ne'e, defeza mós konkorda ho pena ne'ebé mak prokuradór husu ho konsiderasaun sira katak arguidu iha kooperasaun di'ak ho tribunál hodi konfesa faktu integralmente, arrepende nia hahalok, seidauk di'ak malu ho ofendida maibé arguidu promete sei tau matan ba nia oan sira, serbisu hanesan badaen maibé depoisde akontesimentu to'o agora seidauk serbisu fali, nune'e laiha rendimentu fiku kada fulan, foin primeiravés halo krime hasoru nia feen ki'ik mai hatan iha tribunál, moris hamutuk ho feen ki'ik ne'e iha oan na'in rua hela ho ofendida no promete sei larepete hikas nia hahalok sira hasoru ofendida ka ema seluk iha futuro.

Desizaun

Hafoin halo avaliasaun ba faktu sira hotu, tribunál prova katak arguidu hirus buti dala ida iha ofendida nia kakorok no dudu ofendida to'o monu ba rai rezulta ofendida sofre moras.

Bazeia ba faktu provadu sira no tetu sirkunstánsia hotu-hotu ne'ebé iha, tribunál konklui prosesu ne'e no kondena arguidu ho pena multa US\$45.00 ne'ebé kada loron arguidu sei selu 0,75 sentavus durante loron 60. Tribunál mós aplika pena alternativa durante loron 40 iha prizaun, bainhira arguidu lakumpri pena multa referdesizaun hosi primeira instánsia ne'e.

2. Danu simples no ofensa ba integridade física simples ho natureza VD

Nú. Prosesu	: 0031/25. OESIC
Kompozisaun Tribunál	: Singulár
Juis	: Dr. Evangelino Belo
Prokuradór	: Dr. José Elo
Defeza	: Dr. Calisto Tout
Desizaun	: Omologa pedidu dezisténsia keixa no pena multa US\$60.00

Iha 19 Setembru 2025, Tribunál Judisiál Primeira Instánsia Oekusi prezide leitura sentensa ba krime ofensa ba integridade física simples ho natureza VD no tentativa konsiliaaun ba danu simples ne'ebé envolve arguida FC hasoru nia la'en, iha RAEOA.

Akuzasaun Prokuradór

Prokuradór akuza katak iha 03 Marsu 2025, iha oras tuku 20:20 kalan, arguida uza ai-saar baku dala ida iha ofendidu nia reen-to'os kauza moras, baku dala ida iha liman rua

kauza moras, uza fatuk tuda dala ida la kona ofendidu maibé kona fali kareta nia lampu senen rahun ho valor US\$45.00. no depoisde akontesimentu ofendidu hato'o keixa iha PNTL Eskuadra Pante-makasar.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3 no 35 (b) no 36 LKVD no artigu 258 KP kona-ba danu simples ho moldura penál to'o tinan 3 ka multa.

Produsaun ba prova sira

Bazeia ba artigu 262 KPP, kona-ba tentativa ba konsiliaun ba kazu sira ho natureza semi-públiku, nune'e antes tama ba prosesu produsaun ba prova sira, juis halo tentativa konsiliaun ba kazu danu simples. Iha prosesu konsiliaun ne'e ofendidu hakarak deziste ninia keixa hasoru arguida sein kondisaun ruma tanba antes mai tribunál dame malu ona no arguida mós konkorda, nune'e ofendidu husu ba tribunál atu deziste nia keixa hasoru arguidu, prokuradór ho defeza laiha opozisaun no husu atu omologa prosesu ne'e, nune'e tribunál omologa pedidu dezisténsia keixa ne'e.

Enkuantu ba krime ofensa ba integridade fízika simples ho natureza VD, arguida deklara katak faktu sira iha akuzasaun prokuradór nian loos hotu, razaun tanba sira sosa karau ho folin US\$850.00 no oho faan hotu maibé hetan de'it US\$600.00 nune'e arguida nervozu hodi halo agresaun, depoisde akontesimentu liu loron rua di'ak malu fali, arguida rekoñese hahalok baku ne'e ladi'ak, arrepende ona nia hahalok no promete iha futuro sei la komete tan aktu hanesan hasoru ofendidu.

Prokuradór husu ba tribunál atu presinde ofendidu nia deklarasaun ho konsiderasaun katak faktu sira ne'ebé produs ne'e sufisiénte ona no hosi parte defeza laiha opsaun seluk. Tanba ne'e, tribunál bazeia ba pedidu hirak ne'e hotu presinde deklarasaun ofendida nian.

Alegasaun finál

Prokuradór haktuir katak arguida konfesa ba faktu hotu iha akuzasaun, arguida halo duni agresaun hasoru ofendida, nune'e arguida nia aktu ne'e prenze duni rekezitu krime no husu ba tribunál atu aplika pena multa US\$60.00 ba arguida.

Entretantu defeza haktuir katak arguida konfesa integralmente katak nia halo duni agresaun hasoru nia la'en tanba sosa karau depois oho no faan fali naan karau maibé osan la fila hotu, arguida konfesa integral, deklara ho onestu, arrepende no dame malu ona, nune'e defeza husu ba tribunál atu kondena arguidu ho pena ne'ebé adekuadu.

Desizaun

Depoisde avalia faktu hotu, tribunál konsidera faktu sira ne'ebé hakerek ona iha akuzasaun prokuradór nian provadu hotu bazeia ba konfisaun arguidu nian.

Bazeia ba faktu provadu sira ne'e no tetu mós ho sirkunstánsia atenuante sira hanesan arguida konfesa integral, arrenpende no foin primeiravés mai hatan iha tribunál nune'e tribunál konklui prosesu ne'e hodi kondena arguidu ho pena multa US\$60.00 ne'ebé kada loron arguidu sei selu US\$1.00 durente loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

3. Krime ofensa ba integridade fízika simples ho natureza VD

Nú. Prosesu : 0023/25.OEPMK
Kompozisaun Tribunál : Singulár
Juis : Dr. Evangelino Belo
Prokuradór : Dr. Jose Elo
Defeza : Dr. Calisto Tout
Desizaun : Pena multa US\$67.50

Iha 19 Setembru 2025, Tribunál Judisiál Primeira Instánsia Oekusi, prezide leitura sentensa ba krime ofensa ba integridade fízika simples ho natureza VD ne'ebé envolve arguidu NFF hasoru nia feen, iha RAEOA.

Akuzasaun Prokuradór

Prokuradór akuza katak iha 11 Marsu 2025, iha oras tuku 20:00 kalan. Arguidu tuku dala ida iha ofendida nia matan fukun parte loos no tuku dala rua iha ofendida nia brasu parte karuk. Konsekuensia hosi arguidu nia hahalok ne'e rezulta ofendida sofre moras. Aktu ne'e akontese bainhira arguidu sunu tiha sira nia uma no ofendida nia maun atu lori arguidu ho ofendida ba hela fali iha Dili. Kazu ne'e aneksa ho relatóriu médiku hosi PRADET no fotografia husi Polísia-VPU kona-ba aktu violénsia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa konjuga ho artigu 2, 3 (a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun prokuradór nian no deklara katak arrepende ninia hahalok. Arguidu promete ba tribunál sei la halo tan krime hasoru ofendida iha futuru, dame malu ona ho ofendida no kontinua hela hamutuk to'o agora. Arguidu hatutan katak nia foin primeiravés komete krime no foin mai hatan iha tribunál, serbisu nu'udar agrikultór, laiha rendimentu fiksi kada fulan no iha oan na'in rua no arguidu mak iha responsabilidade ba iha nia família.

Entretantu ofendida kontinua konfirma faktu hotu iha akuzasaun no deklara katak depoisde akontesimentu ne'e ofendida ho arguidu dame malu kedas no moris hamutuk hanesan feen-la'en to'o agora laiha ona problema seluk.

Alegasaun finál

Prokuradór konsidera arguidu provadu komete agresaun fízika hasoru ofendida tuir faktu sira iha akuzasaun. Tanba ne'e, husu ba tribunál atu kondena arguidu tuir pena ne'ebé define ona iha artigu 145 KP.

Entretantu defeza haktuir katak arguidu konfesa faktu hotu iha akuzasaun, arrepende ninia hahalok, promete sei la halo tan krime hasoru nia membru família ka ema seluk, kolabora di'ak ho tribunál, dame malu ona ho ofendida, nu'udar agrikultór, laiha rendimentu fiksi no iha oan na'in rua. Tanba ne'e, husu ba tribunál atu aplika pena ne'ebé adekuadu ba arguidu tuir nia sala.

Desizaun

Hafoin halo avaliasaun ba faktu sira hotu no tribunál prova no konsidera arguidu halo duni agresaun fízika hasoru nia feen tanba tuku duni ofendida dala ida iha matan fukun parte loos no tuku dala rua iha brasu parte karuk hodi rezulta ofendida sofre moras.

Bazeia ba faktu provadu hirak ne'e hotu no tetu mós ba aktu krime ne'ebé mak hatodan no hakamaan arguidu nia responsabilidade kriminál. Tanba ne'e tribunál konklui prosesu ne'e hodi kondena arguidu ho pena multa US\$67.50 ne'ebé kada loron arguidu tenke selu 0,75 sentavus durante loron 60. Alende ne'e, tribunál mós aplika pena alternativa ba arguidu durante loron 40 iha prizaun, bainhira arguidu lakumpri pena multa refere.

4. Krime ofensa ba integridade física simples ho natureza VD

Nú. Prosesu	: 0017/25.OEPMK
Kompozisaun Tribunál	: Singulár
Juis	: Dr. Evangelino Belo
Prokuradór	: Dr. Jose Elo
Defeza	: Dr. Calisto Tout
	: Dr. Sergio Vitor
	: Dra. Ramila Anuno
Desizaun	: Pena multa US\$67.50

Iha 23 Setembru 2025, Tribunál Judisiál Primeira Instáncia Oekusi, prezide leitura sentensa ba krime ofensa ba integridade física simples ho natureza VD ne'ebé envolve arguidu ET hasoru nia feen, iha RAEOA.

Akuzasaun Prokuradór

Prokuradór akuza katak iha 21 Fevereiro 2025, iha oras tuku 08:00 dadeer, iha altura ne'eba ofendida fanu no hakilar ba nia bei-oan sira hodi dehan "asu sira, hader haris ona para ba eskola". Tanba ne'e arguidu sente-aan, diretamente kaer ofendida nia liman rua hodi riba tun ba rai, depois arguidu kontinua uja nia ain hodi tebe ofendida dala rua kona iha ofendida nia kabun no dala ida kona iha ofendida nia kanotak sorin loos rezulta kabun moras, kidang bubu, metan no moras. Kazu ne'e aneksa ho relatóriu médiku hosi PRADET no fotografia kona-ba aktu violénsia ne'e hasai hosi Polísia-VPU.

Prokuradór akuza arguidu kontra artigo 145 KP kona-ba ofensa ba integridade física simples ho moldura penál to'o tinan 3 prizaun ka multa no konjuga ho artigo 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu sira hotu iha akuzasaun no deklarata katak arguidu arrepende ninia hahalok, di'ak malu ona ho ofendida, foin primeiravés komete krime hasoru ofendida no foin mai hatan iha tribunál, nu'udar agrikultór, laiha rendimentu fiksi no iha oan na'in haat (4) no arguidu mak iha responsabilidade maximu ba iha nia família.

Entretantu ofendida kontinua konfirma faktu sira iha akuzasaun inklui deklarasaun arguidu nian katak dame malu ona. Ofendida mós haktuir tan katak depois akontesimentu to'o agora arguidu la baku ona ofendida.

Alegasaun finál

Prokuradór konsidera arguidu provadu komete krime hasoru ofendida tuir faktu sira iha akuzasaun prokuradór nian bazeia ba arguidu nia konfiksaun. Maske arguidu di'ak malu ona ho ofendida, maibé haree ba realidade katak krime violénsia doméstika kontinua

akontese iha Oekusi, nune'e husu ba tribunál atu kondena arguidu ho pena prizaun tinan ida fulan neen suspende ba tinan rua.

Entretantu, defeza husu ba tribunál atu kondena arguidu ho pena ne'ebé adekuadu ho konsiderasaun sira katak arguidu konfesa integralmente ba faktu sira, oan na'in haat (4), arrepende ninia hahalok no kolabora di'ak ho tribunál. Arguidu mós di'ak malu ona ho ofendida, foin primeiravés komete krime hasoru ofendida no foin mai hatan iha tribunál.

Desizaun

Depoisde avalia faktu hotu durante julgamentu, tribunál prova katak ofendida hakilar sira nia beioan dehan asu hodi halo arguidu sente-an no hirus kaer duni ofendida nia liman rua riba tun ba iha rai no kontinua tebe ofendida dala rua kona iha ofendida nia kabun no dala ida kona iha ofendida nia kanotak sorin loos rezulta kabun moras, kidang bubu, metan no moras.

Bazeia ba faktu provadu ne'e no tetu mós ho sirkunstánsia atenuante hanesan arguidu foin primeiravés mai hatan iha tribunál no arguidu arrepende ninia hahalok. Ho nune'e tribunál konklui prosesu ne'e no kondena arguidu ho pena multa US\$67.50 ne'ebé kada loron arguidu sei selu 0,75 sentavus durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

5. Krime ofensa ba integridade fízika simples ho natureza VD

Nú. Prosesu	: 0100/24.OEPMK
Kompozisaun Tribunál	: Singular
Juis	: Dr. Benjamin Barros
Prokuradór	: Dr. Jose Elo
Defeza	: Dr. Calisto Tout
Advogadu Privadu Estajiáriu	: Dra. Ramila Anuno
	: Dr. Sergio Vitor
Desizaun	: Pena multa US\$45.00

Iha 30 Setembru 2025, Tribunál Judisiál Primeira Instánsia Oekusi, prezide leitura sentensa ba krime ofensa ba integridade fízika simples ho natureza VD ne'ebé envolve arguidu ET hasoru nia feen, iha RAEOA.

Akuzasaun Prokuradór

Prokuradór akuza katak iha 27 Outubru 2024, maizumenus iha oras tuku 22:00 kalan, iha loron refere, ofendida ho nia oan feto ki'ik toba dukur hela iha kaurtu laran, derepente arguidu ho kondisaun lanu tama ba iha kuartu laran direktamente tebe ofendida dala ida ihaibun halo ofendida hakfodak no sente moras maka'as ihaibun. Kazu ne'e aneksa hamutuk ho relatóriu médiu hosi PRADET no fotografia hosi polísia-VPU kona-ba aktu violénsia ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura pen ál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun katak faktu sira ne'ebé hakerek iha akuzasaun ne'e loos hotu no aktu ne'e akontese bainhira arguidu fila ba uma ho

kondisaun lanu fanu ofendida la hader. Arguidu haktuir tan katak depoisde akontesimentu sente nia hahalok ne'e ladi'ak, arrepende nia hahalok, di'ak malu ona, foin primeiravés halo krime no mai hatan iha tribunál, oan na'in lima, serbisu hanesan to'os na'in laiha rendimentu fiksi kada fulan, hela iha uma rasik no promete sei larepete hikas hahalok ne'e iha futuru.

Alende ne'e, ofendida kontinua konfirma faktu sira hotu iha akuzasaun no depoisde akontesimentu arguidu buka tuir duni ofendida iha nia inan/aman sira nia uma hodi husu deskulpa foin lori fila ofendida ba fali sira nia uma to'o agora labaku ona ofendida.

Alegasaun finál

Prokuradór konsidera arguidu nia hahalok ne'e provadu tanba arguidu fila ba uma ho kondisaun lanu direktamente tebe ofendida niaibun rezulta moras maka'as iha ofendida niaibun. Prokuradór reforsa liután katak atu halo prevensaun ba krime refere iha futuru labele akontese no husu ba tribunál atu kondena arguidu ho pena prizaun fulan neen suspende ba tinan ida hodi eduka arguidu la repete hikas nia hahalok ne'e iha futuru.

Entretantu, defeza husu ba tribunál atu kondena arguidu ho pena ne'ebé adekuadu tuir arguidu nia sala ho konsiderasaun sira katak durante iha produsaun ba prova arguidu kolabora diak ho tribunál hodi konfesa faktu hotu iha akuzasaun, depoisde akontesimentu sente nia hahalok ne'e ladi'ak, arrepende nia hahalok, di'ak malu ona, foin primeiravés halo krime no mai hatan iha tribunál, oan na'in lima, serbisu hanesan to'os na'in laiha rendimentu fiksi kada fulan, hela iha uma rasik no promete sei larepete hikas hahalok ne'e iha futuru.

Desizaun

Hafoin halo avaliasaun ba faktu hotu ne'ebé produs durante julgamentu tribunál konsidera hahalok arguidu nian priense duni elementu krime ofensa ba integridade física simples ho natureza violência doméstica.

Bazeia ba faktu provadu hirak ne'e no tetu mos ba aktu krime ne'ebé mak hatodan no hakamaan arguidu nia responsabilidade kriminál, nune'e tribunál konklui prosesu ne'e no kondena arguidu ho pena multa US\$45.00 ne'ebé kada loron arguidu sei selu 0,75 sentavus durante loron 60. Alende ne'e, tribunál mós aplika pena alternativa durante loron 40 iha prizaun, bainhira arguidu lakumpri pena multa refere.

6. Krime ofensa ba integridade física simples ho natureza VD

Nú. Prosesu	: 0044/24.OESIC
Kompozisaun Tribunál	: Singulár
Juis	: Dr. Benjamin Barros
Prokuradór	: Dr. Jose Elo
Defeza	: Dr. Calisto Tout
Advogadu Privadu Estajáriu	: Dra. Ramila Anuno
	: Dr. Sergio Vitor
Desizaun	: Pena prizaun fulan 6 suspende ba tinan 1

Iha 30 Setembru 2025, Tribunál Judisiál Primeira Instância Oekusi prezide leitura sentensa ba krime ofensa ba integridade física simples ho natureza VD ne'ebé envolve arguidu CS hasoru nia feen, iha RAEOA.

Akuzasaun Prokuradór

Prokuradór akuza katak iha 18 Outubru 2023, maizumenus iha oras tuku 12:00 meiodia, arguidu basa dala ida iha ofendida nia matan fukun parte loos kauza bubu, metan, moras. Aktu ne'e akontese bainhira ofendida ba tuir tiha eleisaun suku nian lafila ba sira nia uma, maibé ofendida ba fali nia inan aman nia uma.

Prokuradór akuza arguidu kontra artigu 145 KP kona-ba ofensa ba integridade física simples ho moldura penal to'o tinan 3 prizaun ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu parsialmente katak arguidu labasa ofendida iha matan fukun parte loos tanba iha momentu akontesimentu ne'e arguidu mai tiha iha Oekusi vila halo serbisu no laiha uma. Arguidu haktuir tan katak bainhira fila to'o iha uma husu arguidu nia ama no arguidu nia ama informa katak ofendida ohin ba tuir eleisaun to'o agora lafila mai uma, nune'e arguidu telefone ba ofendida no ofendida hateten ba arguidu katak "hau hela ho hau nia inan/aman lahan ka". Arguidu haktuir tan katak durante moris hamutuk ho ofendida iha oan na'in rua, foin primeiravés mai hatan iha tribunál, serbisu hanesan to'os na'in laiha rendimentu fiksi kada fulan no arguidu mak iha responsabilidade ba nia família.

Entretantu, ofendida deklara katak faktu sira ne'ebé hakerek iha akuzasaun ne'e loos hotu tanba depoisde akontesimentu mak arguidu tun mai Oekusi vila halo serbisu. Ofendida haktuir tan katak depoisde akontesimentu to'o agora seidauk dame malu moris keta-ketak no arguidu nunca ba buka tuir ofendida iha nia inan/aman sira nia uma.

Alegasaun final

Prokuradór konsidera arguidu ninia hahalok ne'e priense duni elementu krime ofensa ba integridade física simples ho natureza VD, mezmuke iha produsaun ba prova arguidu nega faktu balun iha akuzasaun. Prokuradór reforsa liu tán katak lolos arguidu mak iha responsabilidade bo'ot atu proteje ofendida ho nia oan sira hosi kualker ameasa ne'ebé mak mosu maibé pelu kontrariu arguidu mak prática fali aktu violénsia ne'e hasoru nia feen nu'udar feto ida ne'ebé laiha forsa hanesan ho arguidu. Tanba ne'e, prokuradór husu ba tribunál atu aplika pena prizaun tinan ida fulan neen suspende ba tinan rua.

Entretantu, hosi parte defeza fiar liu ba arguidu nia deklarasaun perante iha produsaun ba prova no husu ba tribunál atu absolve arguidu hosi krime ne'e. Defeza haktuir tan katak arguidu iha oan na'in rua, foin primeiravés mai hatan iha tribunál, serbisu hanesan to'os na'in laiha rendimentu fiksi kada fulan no arguidu mak iha responsabilidade ba nia família, tanba depoisde akontesimentu arguidu mak hela ho nia oan sira to'o agora.

Desizaun

Depoisde avalia ba faktu sira hotu ne'ebé produs durante julgamentu tribunál prova katak arguidu basa duni ofendida dala ida iha matan fukun parte loos kauza bubu, metan, moras no depoisde akontesimentu ne'e sira moris separa to'o agora. Tribunál prova liu tan katak fiar liu ba ofendida nia deklarasaun tanba depoisde akontesimentu mak foin arguidu tun ba Oekusi vila halo serbisu no arguidu nunca buka tuir ofendida hodi dame malu.

Bazeia ba faktu provadu hirak ne'e hotu no tetu mós ba aktu krime ne'ebé mak hatodan no hakamaan arguidu nia responsabilidade kriminál. Nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl